

Date – 16/04/2026

Time - 18:30 -18:40Hrs

AKASHVANI AIZAWL
REGIONAL NEWS BULLETIN

HEADLINES (EVENING)

1. Aizawl Municipal Corporation-AMC inthlan atana Home Voting ah mi 2,594-in vote an thlak a, vote tla hi zaa 93 point 71 a tling.
2. India ram Chhiarpui 2027 atana Mizoram puma Houselisting and Housing kalpui tura inziahluh bultanna Larsap, General (Retd) Vijay Kumar Singh-a hovin vawiin khan Lok Bhavan ah neih a ni.
3. Vawiin khan Women's Reservation Bill chungchang sawihoin abika Lok Sabha Budget session thutkhawm tan a ni
4. Women Reservation Bill chungchang sawihonaah Prime Minister Narendra Modia chuan lungrual taka hmeichhiate seat hauhsakna chu pawm turin a party tin a sawm.

<><><>

HOME VOTING

Aizawl Municipal Corporation-AMC inthlan atana Home Voting ah mi 2,594-in vote an thlak a, vote tla hi zaa 93 point 71 a tling.

Home voting hi tunkar Thawhtanni atang khan kalpui tan niin, vawiin tlai dar 5 kha a tawp hun a ni a; vawiin tlai dar 5 thleng khan Home Voting ti tura dilna lut 2,768 zinga mi 2,594-in vote an thlak a; za zela 93 point 71 niin, vote thlak lo mi 174 an awm.

Home Voting buaipuitute chuan Akashvani News Aizawl zawhna chhangin, vote thlak dil zinga vote thlak leh lo an awm chhan chu an ina an va kalchilh hnua vote thlak leh duh lo te, damlohna avanga inentira kalchhuakte leh a then chu lo boral tawhte an awm vang a nih thu an sawi.

AMC inthlanpui atana Home Voting hi vote thlakna hmun (polling station) pan thei lo - kum upa te, damlo natna khirh bik nei leh pianphung a rualbanlote tan ruahman a ni a; AMC Ward 19-ah kalpui niin, ward tinah Home Voting Team pakhat theuh awm an awm a ni.

<><><>

AKASHVANI DONATES CMRF

Akashvani Aizawl chuan vawiin khan Chief Minister Relief Fund atan cheng sing 2 an pe.

Akashvani Aizawl aiawh hian Director leh Mizoram Cluster Head Pu DR Lalropuia chuan Chief Minister Pu Lalduhoma hnenah Chief Minister Relief Fund hi a hlan a, he hunah hian Asst Director (Prog) Pu Biakchungnunga leh Asst Director (News) Gin Gangte leh Akashvani thawktute an tel a ni.

Relief Fund hlanna ah hian Chief Minister hi Akashvani in kum 90 tlin lawmna June ni 8-a a buatsaih turah khuallian atan sawm a ni a, Akashvani kum 90 tlin lawmna hi Vanapa Hall a neih tur a ni a, Pu Lalduhoma hian function-a khuallian a nih dawn bakah Akashvani kum 90 tlin lawmna Monument Akashvani station Tuikhuahtlangah a hawng dawn bawk a ni.

Akashvani Aizawl Director leh Mizoram Cluster Head Pu DR Lalropuia chuan Akashvani kum 90 tlin lawmna chu ropui taka lawm tum ani a ti a, Programme hrang hrang buatsaih ani dawn tih sawiin chak taka inbuatsaihna kalpui anih thu a sawi bawk.

<><><>

GOVERNOR CENSUS

Larsap, General (Retd) Vijay Kumar Singh-an vawiin khan India ram Chhiarpui 2027 atana Mizoram puma Houselisting and Housing kalpui tur inziahlul bultanna Lok Bhavan, Aizawlah a nei.

Hemi hnu hian ram chung hmun dangte rualin Mizoramah Houselisting and Housing chhiarpui kalpui tan a ni.

Larsap chuan chhiarpui buaipuitute chu hmaih awm lo tura theihtawp chhuah tura chahin, hriat thiam loh neite pawh tha taka hrihfhiah zela, India ram chhiarpuia inziaklut vek thei tura tan la turin a chah a. A vawi khat nana digital census kalpui a ni chu phurawm a tih thu sawiin, a hlawhtlin ngei theih nan mipuite pawh chhiarpui buaipuitute tha taka lo tawiawm turin a chah bawk.

VC

Chhiarpui 2027 hi India rama digital census hmasa ber tur niin, thawh hniha kalpui tur a ni a. Thawh khatna Houselisting and Housing hi kumin April ni 1 atang khan kalpui tan a ni a. Thawh hnihna, Population Enumeration hi February 2027-ah neih tan tur a ni thung ang. Thawh khatna hnuaiah hian April 1, 2026 atanga April 15, 2026 chung khan mahni inziahlul Self-Enumeration neih a lo ni tawh a, vawiin atanga May 15 thleng hian Houselisting and Housing kalpui a ni ang.

<><><>

CESJ PROTEST

Centre for Environmental & Social Justice (CESJ) working chairman Pi Vanramchhuangi chuan sorkarin Aizawl Lammual chhehvel kawngpui hnaia ding thingkung engemaw zat kih tura hma a lakna chu thih huamin an dodal zel dawn a ti.

Tunkar Thawhlehi khan Vanapa Hall epa AR ram chhuah an huam chhunga thingte chu Aizawl Bazar Bungkawn leh Dâk Inpui inkar kawng tihzauhna tura kawng laih zauh nan kih tan a ni a, hemi an hriat veleh CESJ-te chuan hma la in, thingkih hi chhunzawm a nih loh nan nimin leh vawiin khan thingkit tute an dang a; thingkih hi chhunzawm a ni ta rih lo a ni.

CESJ working chairman Pi Vanramchhuangi chuan Akashvani News Aizawl zawhna chhangin, sorkarin thing kit zâwnga kawngpui tih zauh a tumna chu tha lo an tih thu a sawi a, kawngpui zau tha leh nuam chu anni pawhin an duh tho rualin, helai hmun zîmtea thing 176 lai kawng tihzauh nana kih hian Aizawl khawpui traffic tawt a tihziawm phah an rin loh thu sawiin, thih huama an hmalaknin awmzia a neih loh chuan Court hial pawh an kal dawn tih a sawi.

Sorkarin thing kih tur a chhinchhiah 176-te hi venghim turin thih huamin an tang dawn tih sawiin Pi Vanramchhuangi chuan, Assam Rifles-in Lammual leh a chhehvel an chhuahsan hma deuh khan thing awmzat chhiarna an neih thu a sawi a, thing 480 vel an chhiar a, chu'ng zingah chuan khawvela thing vâng tak tak leh boruak tha (oxygen) pe chhuak hnem tak takte pawh a awm a ti.

VC

Aizawl Khawpui Chei Tharna Lungphun - Early Bird Project tih vuahin kumin March ni 17 khan Chief Minister Pu Lalduhoma chuan Aizawl khawpui lailia Assam Rifles-te hmun chhuahsan huam chhung, Lammual kiang kawngpui dungah kawng laih zauhna tur lungphum a phum a, hemi ni hian hna tan nghal niin, sorkar hmalaknaa thing kih turah hian thuneitute atangin phalna lak a ni.

<><><>

MUHCS

Mizoram Information Commission chuan Mizoram State Health Care Society chu langtlang taka MUHCS kalpui turin a hriattir a;

Advocate J.Malsawmzuala Vanchhawng chuan RTI hmanga Mizoram State Health Care Society leh Synod Hospital-te MUHCS-a an inremna chungchang zawhna a thehluh chu Mizoram State Health Care Society chuan danin a bituk ang hunah chhanna a pek loh bakah, chhanna a pekah pawh a lungawi loh avangin complaint a thehlut leh a; Mizoram Information Commission full bench chuan tun thla ni 9 khan a ngaihtuah a, Hearing-ah hian complaint thehluttu leh Mizoram State Health Care Society SPIO leh RTI zawhna luh hunlaia SPIO te an inlan a, Mizoram Health Care Society leh Synod Hospital ten MUHCS kalpuina tura inremna an ziah copy leh detail pricing chu tun thla ni 17 naktuk ral hmaa complaint thehluttu hnena a thlawna pe turin State Information Commission hian SPIO chu thu a pe a ni.

Hetihlai hian, Mizoram Pradesh Congress Committee MPCC thupuangtu Dr Lallianchhunga chuan MUHCS chu huapzo tak leh sumdawng rilru pu loa kalpui turin ZPM sorkar a ngen.

Dr Lallianchhunga chuan vawiin khan Aizawl Press Club-ah thuthar thehdarhtute a kawm a, MUHCS-ah mipui tam zawk inziaklut tura ZPM sorkarin a beisei a nih chuan inziahluh man a tihnia m tura an ngaih thu sawiin, huapzo tak leh sumdawng rilru pu loa MUHCS chu kalpui turin Congress party chuan ZPM sorkar an ngen tih a sawi a; MUHCS a inziah luhna man a tam em avangin Kohhran hrang hrangte an member-te tanpui tura an pen chhuah angai ta hi ZPM sorkar tan a zahthlak zawk hlea an ngaih thu a sawi.

(BYTE - Dr Lallianchhunga, MPCC)

Dr Lallianchhunga chuan, MUHCS chu a hmang tangkai tawhtu damlote an hmaizah avangin Congress party chuan a pawng a takin sawisel an hreh hle tih sawiin, MUHCS enkawltu official ten theihtawp an chhuah laiin ZPM sorkar hotu liante hian a nihna bak baka an fak thin erawh tha an tih loh thu a sawi a; MUHCS chu cheng nuai 23 senga hmanhmawh taka Thailanda Minister hoa phuailuai taka han zir a nih vang nge ni, a hmangtu mipui nawlpui te leh sorkar atanga hlawh late atangin sawiseln a tam ta hle a ni, a ti baw.

<><><>

ZOBAWK BANDH

Kum 6 chhung ang khaw paltlang National Highway siam mumal loha awm mek, siamthat ngiatin Zobawk Jt YMA chuan tukin dar 5:00 atang khan an khaw paltlangtu kawngpui chu danpingin Total Bandh an huaihawt.

Kan corr sawi danin, Zobawk khawtlang hi an thawkchhuak tha a, chhungkaw tin atanga mi pakhat zel duty turin an chhuak a, an lungawiloh lantir nan puandum in tinah zar a ni.

(BYTE)

Vawiin khan DC kaihhruaiin kawngpui siamtu NHIDCL leh YMA te pawhin meeting an nei a, hetah hian Magistrate vilna hnuaiyah naktuk atanga kawngpui siam hna thawh tan ni se tiin Zobawk khawtlang hruaitute chuan an ngen a, Zobawk thutchilh mektu Magistrate Pu Thlengliana (SDO(S) chuan khawtlang mipui te chu sorkar thuchhuak ngaichang turin a hrih a, naktukah contractor lamin hna an thawh dawn tan dawn thu a sawi baw.

Tun dinhmunah Zobawk luh dawn chhim leh hmarah motor thahnem tak a tang mek a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Chanchinthar hi naktuk zing dar 7 leh a chanve-ah puan leh a ni ang.

<><><>

PARLIAMENT ON WOMEN RESERVATION

Vawiin khan Women's Reservation Bill chungchang sawihoin abika Lok Sabha Budget session thutkhawm tan a ni a. Bill pathum Constitution (131st) Amendment Bill, Delimitation Bill, 2026, leh Union Territories Laws (Amendment) Bill, 2026 te house ah putluh a ni a.

Ram danpui siamthatna tur leh Hmeichhiate tana seat hauhsakna tur bill puluttu Union Law Minister Arjun Ram Meghwal chuan vawiin hi hun chhinchhiahtlak tak anih thu a sawi a. Hmeichhiate tan politics ah rorelna dik pek a ni tawh dawn a ti a. He dan thar hian hmeichhiate tan intluktlanna a thlen dawn a ti a. Hmeichhiate tana seat zaa 33 hauhsak hun a thleng tawh a ti a. Hetianga seat hauhsak an nih dawn chuan Lok Sabha seat chu zaa 50-a tihpun a tul dawn a ti a. Lok Sabha seat chu avaiin 815 ah a kai chho tawh ang a ti a. Heta tang hian 272 chu hmeichhiate tana hauhsak a ni ang a ti.

Prime Minister Narendra Modia chuan ramchhung mipui zaa 50 ten thutlukna siamna kawngah tha an thawh ve a hun tawh a ni a ti a. Ram hmasawna kawngah leh policy siamna kawngah hmeichhiate an tangkaiin an thawhhlawk tawh hle a ti a. PM Modia chaun Opposition party te pawh he dan thar chungchangah hian politics hamthatna lak tum lo tura ngein mi zawng zawng tan leh ram rorelna atana thil tha ber tur zawk anih thu a sawi a ni.

Hetihlai Samajwadi Party hruaitu leh MP Akhilesh Yadav chaun hmeichhiate seat hauhsak chu an thlawp thu a sawi rualin hetiang ang dan pawimawh tak mai hmanhmawh taka sawrkarin a nawr chu an duh lo a ti a. Tuna rampum chhiarpui neih mek zawh hunah hmeichhiate tana seat hauhsakna bill hi chu putluh chauh tur a nih thu a sawi a ni.

Congress hruaitu Gaurav Gogoi pawhin women's reservation chu an thlawp a ti a. Pu Gogoia chuan bill an thlawp rualin seat awmsa ti pung loin 543 ah hian hmeichhiate tana hauhsak zat bithliah an duh thu a sawi a. Sawrkar chu tul lovah he bill hi a tikhawtlai nia puhin rang taka hman an duh thu a sawi a ni.

<><><>